

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. उपराज्यपाल मनोज सिन्हा होरें आखेआ जे श्री गुरु तेग बहादुर जी बलिदान ते वैश्विक भाईचारे दी मूर्त हे ते असें सभनें गी रमानदारी ते संबोध दे उन्दे आदर्श पर टुरना लोड़चदा ऐ।
2. फौज दी उत्तरी कमान दे कमांडर लेफ्टिनांट जनरल प्रतीक शर्मा होरें जम्मू च आतंकवादी खतरें कन्नै निब्वड़ने लेई मती सरगर्मी कन्नै गैई पुट्टने दा आह्वान कीता ऐ।
3. केंद्री मंत्री डॉ. जितेंद्र सिंह होरें कठुआ जिले दे रामकोट इलाके च आयोजित एकता मार्च कार्यक्रमै च शिरकत कीती।
4. जम्मू मिडनाइट मैराथन दा त्रीया संस्करण कामयाबी कन्नै आयोजित कीता गेआ जेदे च खरी मती गिनतरी च लोकें हिस्सा लैता।
5. ते टैस्ट क्रिकेट च कोलकाता दे ईडन गार्डन्स च खेडे गेदे द'ऊं टैस्ट मैचें दी श्रृंखला दे पैहले मुकाबले च दक्खन अफ्रीका नै मेजबान भारत गी त्रीएँ द्रौड़ें कन्नै हराई दित्ता।

<><><><><><>

LG-Nagar Kirtan

उपराज्यपाल मनोज सिन्हा होर अज्ज श्री गुरु तेग बहादुर जी दे 350में शहीदी ध्याड़े दे उपलक्ष्य च आयोजित कीते गेदे नगर कीर्तन च शामिल होए। इस मौके अपने संबोधन च उपराज्यपाल होरें आखेआ जे गुरु तेग बहादुर जी त्याग ते वैश्विक सतह पर आपसी भाईचारे दी मसाल हे ते इस मौके पर असेंगी लोड़चदा ऐ जे अस उंदे अमन-

रमानदारी ते सद्भाव दे आदर्श पर चलने दा संकल्प लैचे। श्री सिन्हा होरें आखेआ जे स्थाळे पूजनेजोग सिख गुरूएं अपने महत्वे आहले योगदान ते बिजन स्वार्थ दे बलिदान कन्नै भारत दे मान गी यकीनी बनाया। उनें अगगे आखेआ जे बाहरी हमलें ते माली तंगी दे बावजूद भारत अज्ज पूरी ताकत ते मान कन्नै खड़ोते दा ऐ। श्री सिन्हा होरें जोर देइयै आखेआ जे असेंगी अपने सुखने दे नमें भारत दे निर्माण दे अपने धैय्ये पर अडिग रौहना चाइदा ऐ।

<><><><><><>

Army Commander

फौज दी उत्तरी कमान दे कमांडर लेफ्टिनेंट जनवर प्रतीक शर्मा होरें उधमपुर जिले च आतंकवाद रोधी ग्रिड दा जायजा लैता ते सभनें फौजी अधिकारियें ते जवानें गी आखेआ जे ओहू लगातार सौहगे-सतर्क रौहन तां जे खित्ते च पैदा होने आहली चुनौतियें दा असरदार ढंगै सिर कन्नै मुकाबला कीता जाई सकै। फौजी कमांडर होरें इस दरान बसंतपुर ते रामपुर इलाकें दा दौरा लाया जित्थे पिछले किश बरें दरान कई आतंकवादी घटनां पेश आइयां न। इस मौके पर उनें फौजी जवानें कन्नै गल्लबात बी कीती ते जम्मू-कश्मीर गी आतंकवाद शा मुक्त रखने दी बचनबद्धता ते पेशेवराना रौंऽ लेई उंदी सराहना कीती।

<><><><><><>

Jitender Unity March

सरदार वल्लभ भाई पटेल हुं'दी 150मीं जयंती दे उपलक्ष्य च प्रधानमंत्री नरेंद्र मोदी थमां प्रेरित होइये अज्ज कठुआ जिले दे रामकोट छल्लां ते गलक इलाकें च अखंड भारत दे सनेअ गी समर्पित एकता मार्च सरदार @ 150 दा सरिस्ता कीता गेआ। इस मौके मार्च च शामिल होए दे केंद्री मंत्री डॉ. जितेंद्र सिंह हुंदा भाजपा कार्यकर्ताएं ते आम जनता नै गर्मजोशी कन्नै सोआगत कीता। एहू मार्च 26 नवंबर 2025 तगर लगातार जारी रौहगा। बिलावर थमां विधायक सतीश शर्मा हुंदी नुमायंदगी च आयोजित कीते गेदे इस मार्च च बड़ी मती गिनतरी च मकामी लोकें शिरकत कीती।

<><><><><><>

Leopard

पुंछ जिले च कब्जा रेखा दे नेड़े आहले जांगली इलाके च कल इक तेंदुए दी लोथ बरामद होई। आकाशवाणी दे जम्मू संवाददाता दी रिपोर्ट मुजब जंगलात मैहकमे दी इक टीम गी मनकोट इलाके च बलनोई आहले जंगलै च तेंदुए दी एह लोथ पेदी लब्बी। मन्नेआ जा'रदा ऐ जे बरूदी सुरंग फटने करी एह तेंदुआ मारेआ गेआ होग। ध्यानजोग ऐ जे बन्ने पारा थमां आतंकवादिएं दी इस बक्खी घुसपैठ रोकने दे मकसद कन्नै अगेत्रे इलाकें च फौज आसेआ केई बरूदी सुरंगां बछाइयां गेदियां ना। तेंदुए दी लौथ गी पोस्टमार्टम ते होरनें औपचारिकताएं लेई जंगली-जीएं-जैंतुएं दी हिफाजत आहले मैहकमे दे सुपुर्द करी दित्ता गेआ ऐ।

<><><><><><>

Ramban-Sehkari Mela

रामबन च सहकारी समिति, सहकारी गतिविधियें गी बढ़ावा देने ते मकामी चीजें-बस्तें लेई बजार तगर पुज्ज उपलब्ध करोआने ताई अपने सालाना सहकार मेले दा सरिस्ता करा करदी ऐ। इस मेले दा मकसद सहकारी स्कीमें बारै जागरूकता बधाना, सिखलाई प्रदान करना ते करसानें गी बेहतर कीमतें पर जैविक उत्पाद बेचने ताई इक्क मंच उपलब्ध करोआना ऐ। एह आप सहायता समूहें गी गाहकें कन्नै सिद्धा जुड़ने दा बी मौका उपलब्ध करोआंदा ऐ। सामुदायिक विकास ते राष्ट्र निर्माण च सहकारी समितियों गी भूमिका गी उजागर करने आस्तै गल्लबात आहले सत्र ते नमैशें दा सरिस्ता कीता जा करदा ऐ।

<><><><><><>

Midnight Marathon

जम्मू-कश्मीर खेडू काउंसल आसेआ रियल टाइम स्पोर्ट्स दे सहयोग कन्नै आयोजित कीती गेदी जम्मू मिड नाइट मैराथन कल रातीं ते अज्ज बडुलै जम्मू च कामयाबी कन्नै मुकम्मल होई। इस मैराथन च प्रतिभागियें 2 गेड़ें च द्रौड़ लाई जिंदे च बड़ी मती गिनतरी च धावकें सेहत, खेडू भावना ते आपसी हिरख-प्रेम आहली भावना दा प्रदर्शन कीता। आकाशवाणी दे जम्मू संवाददाता दी रिपोर्ट मूजब, मैराथन दे आयोजकें आखेआ ऐ जे एहदा मकसद सेहतमंद जीवनशैली गी बढ़ावा देना ते खेडू प्रेमियें गी इक्क सांझे मंच पर आहनना हा। एह मैराथन मौलाना

आजाद स्टेडियम थमां पुरु होइयै शैहरा दे बक्ख-बक्ख इलाकें चा होइयै लंग्घी। 42 किलोमीटर ते 21 किलोमीटर आहली मैराथन द्रौड़ें गी जंदी रातीं साड्डे 11 बजे पुरु करवाया गेआ जिसलै के 10 किलोमीटर ते 5 किलोमीटर आहली द्रौड़ां अज्ज बड्डलै 5 बजे शुरू होइयां।

<><><><><><>

IED-Rajouri

सुरक्षाबलें कल सरहदी जिले राजौरी थमां इक्क आई.ई.डी बरामद कीता जिसी मगरा इक नियंत्रित धमाके च तबाह करी दिता गेआ। आकाशवाणी जम्मू दे संवाददाता नै जानकारी दिती ऐ जे थन्नामंडी सब डिविजन दे अप्पर बंगई ग्रांस च कीते गेदे इस धमाके करी इक मकान गी आंशिक तौर पर नुकसान पुज्जा ऐ। अधिकारियें मुजब सुरक्षाबलें दे इक गश्ती दल गी इक घरै दे कोल आई.ई.डी बरामद होआ हा जेदे मगरा बम नकारा करने आहले दस्ते गी उत्थे सद्देआ गेआ जिन्नै नियंत्रित ढंगै कन्नै उस आई.ई.डी गी धमाका करियै तबाह करी दिता।

<><><><><><>

Tribal-Seminar

जवाहर लाल नेहरू युनिवर्सिटी दे गुर्जर बकरवाल जनजातीय अकादमिक फोरम नै जनजातीय गौरव दिवस दे मौके पर इक्क संगोष्ठी दा सरिस्ता कीता जेदा सिरलेख हा रिक्लेमिंग वायसस: फतेह अली सरवरी कसाना हुं'दा जीवन साहित्य ते विरासत। इस कार्यक्रम च विद्वानें, लखारियें ते अफसरें, मन्ने-परमन्ने दे जनजातय विद्वान, कवि, पत्रकार ते समाज सुधारक फतेह अली सरवरी कसाना हुंदे साहित्यिक जोगदान, मुंडली सतह पर उंदे कम्मकाज पर गल्ल-कत्थ कीती गेई। संगोष्ठी च जे.एन.यू दे असिस्टेंट प्रो. डॉ. अनिल कुमार सिंह, डॉ. इशितयाक अहमद शोक ते एडवोकेट अनवर चौधरी हुंदे सने होर दुए वक्ताएं दे पैनल नै अपने-अपने बचार रक्खे।

<><><><><><>

Cricket

कोलकाता दे ईडन गार्डन्स च 2 टैस्ट मैचें दी श्रृंखला दा पहला मैच दक्खन अफ्रीका नै मेजबान भारत गी 30 रन्जें कन्नै हराई दित्ता। दक्खन अफ्रीका आसेआ रक्खे गेदे 124 रन्जें दे लक्ष्यें दा पिच्छा करदे होई दुई पारी च भारत दी पूरी टीम 93 रन्जें पर आउट होई गई। भारती टीम 10 खडारियें कन्नै खेड्डा करदी ही कीजे कप्तान शुभमन गिल कल खेड्डा दरान गर्दन च लग्गने करियै मैच थमां बाहर होई गे हे। एहदे शा पैहले मेहमान टीम नै कल दे स्कोर 7 विकेटें दे नुकसान पर 93 रन्जें थमां अगगे खेडदे होई होई दुई पारी च 153 रन्ज बनाए। द'ऊं मैचें दी श्रृंखला दे पैहले मैच च ईडन गार्डन्स दी पिच बल्लेबाजें लेई चुनौतिएं आहली साबत होई। दक्खन अफ्रीका लेई दुई पारी च बिजन आउट होए दे तेम्बा बावुमा नै शानदार 55 रन्जें दा जोगदान दित्ता।

<><><><><><>

Rajouri-Volleyball

राजोरी दे केरी सैक्टर च कब्जा रेखा लागे भारती सेना आसेआ वालीबॉल टूर्नामेंट दा सरिस्ता कीता गेआ, जेदे च केरी दे नौजोआनें बश्कार जोशीला ते दिलचस्प मुकाबला होआ। इस चाल्ली दे कार्यक्रम भारती फौज दे आम नागरिकें बश्कार निगार ते सकारात्मक सरबन्धें गी बढावा दिंदे न। इन्दे कन्नै नौजोआन बाइखितयार ते सामुदायिक विकास दे नमें मौके पैदा होंदे न। फौज सरहदी इलाकें दे नौजवानें गी नशे थमां दूर रखने दे मकसद कन्नै इस चाल्ली दे खेड्डा मुकाबलें दा सरिस्ता करदी ऐ।

<><><><><><>